

龐居士語錄

重刻龐居士語錄緣起

宗門向上事自達摩西來不立文字教外別傳直指人心見性成佛但接最上根器中下之流固非所及余讀龐居士語錄其叅石頭馬祖問答機緣一言之下便解作活而能破家散宅相與團圓一門超出心空及第豈止棄世珍沉襄水而已哉可謂同樹無別菓同坑無異土顧惟龐公乃補處應身大士現居士身而爲說法故其日用施爲皆從偶諧三昧中流出而作佛事一柄破筴籜左挈右提戴箇烏紗巾混俗和塵向蹉驢邊生擒活捉撞着箇無面目漢一推跌倒幸賴靈照扶起嚇得

虛空汗流夾背噫殊不知大地人被老龐一口吸盡漆
桶不快祇因慈悲之故而有落草之談是故發爲偈頌
詩句諄諄開示直指禪淨唯心之旨無二無二分無別
無斷故吳郡優婆塞錢安軒空相朱寅堂定安江星軒
善護深心念佛以淨土爲指歸先是星軒居士會余開
講彌陀疏鈔隨印雲樓方冊散布在會道俗聽衆相資
教益經中所謂如說修行而供養者也錢公西逝囑其
子霽霞刊布此錄用結文字般若之緣又寅堂居士贊
襄勸助乃付剞劂氏鋟梓流通以廣厥傳舊錄兩卷無
名子序今增續從上古德尊宿拈提偈頌一卷分爲上

中下使彼見聞知所先後其有志於斯道者願與同俎
無上禪悅之法味焉爰述其緣起如此

大清咸豐元年歲次辛亥冬月 日

姑蘇虎邱普度寺海岸沙門乘戒定慧槃譚撰

龐居士語錄詩頌序

居士名蘊字道立襄陽人也父任衡陽太守寓居城南
建菴修行於宅西數年全家得道今悟空菴是也後捨
菴下舊宅爲寺今能仁是也唐貞元間用船載家珍數
萬縻於洞庭湘右罄溺中流自是生涯惟一葉耳居士
有妻及一男一女市鬻竹器以度朝晡唐貞元中禪律
大行祖教相盛分輝引蔓觸所皆入居士乃先參石頭
頓融前境後見馬祖復印本心舉事通立無非合道有
妙德之洪辯合滿字之真詮其後倫厯諸方較量至理
元和初方寓襄陽棲止巖竇

今鹿門南二十里有居士崙

時太守于

公頓擁旃廉問采謠民間得居士篇尤加慕異廼伺良
便躬就謁之一面周旋如宿善友旣深契於情分亦無
間於往來居士將入滅謂女靈照曰幻化無實隨汝所
緣可出視日早晚及午以報靈照出戶遽報曰日已中
矣而有蝕焉可試暫觀居士曰有之乎曰有之居士避
席臨窗靈照廼據榻跌坐奄然而逝居士回見笑曰吾
女鋒捷矣乃拾薪營後事經七日于公往問安居士以
手藉公之膝流盼良久曰但願空諸所有慎勿寔諸所
無好住世間皆如影響言訖異香滿室端躬若思公亟
追呼已長往矣風狂大澤靜移天籟之音月過迷盧不

改金波之色遺命焚棄江湖廼備陳儀事如法茶毗旋遣使人報諸妻子妻子聞之曰這癡愚女與無知老漢不報而去是可忍也因往告子見劬畚曰龐公與靈照去也子釋鋤應之曰嗟良久亦立而亡去母曰愚子癡一何甚也亦以焚化衆皆奇之未幾其妻乃徧詣鄉閭告別歸隱自後沉迹夔然莫有知其所歸者居士尋常曰有男不婚有女不嫁大家團團頭其說無生話其餘玄談道頌流傳人間頗多散軼今姑以所聞成編釐爲二卷永示將來庶警後學世謂居士卽毘耶淨名殆其然乎無名子序

龐居士語錄卷上

刺史于一頓編

石頭和尚居士初叅問師不與萬法爲侶者是什麼人
石頭以手掩居士口居士豁然大悟石頭一日問居士
云子自見老僧已來日用事作麼生居士云若問某甲
日用事直下無開口處石頭云知子恁麼方始問子居
士遂呈頌具陳日用事有朱紫誰爲號青山絕點埃及
運水般柴之句石頭然之曰子以緇耶素耶居士曰願
從所慕遂不剃染

馬祖大師居士後之江南叅見馬祖問不與萬法爲侶

者是什麼人祖云待汝一口吸盡西江水卽向汝道居士言下頓領玄要乃以頌呈有心空及第之句自是諸方莫可禦矣

居士一日問馬祖云如水無筋骨能勝萬斛舟此理如何祖云遮裏無水亦無舟說什麼筋骨

續添語在
傳燈錄

藥山和尚居士到藥山山問云一乘法中還著得這箇事麼居士云祇今日求外合不知還著得這箇事麼山云居士還見石頭得麼居士云拈一放一未是好手山云老僧住持事多居士便珍重山云拈一放一是老僧居士云好箇一乘問宗今日失却去也山云是是

高峯和尚居士入院峰云箇俗人頻頻入院討箇什麼居士乃回顧兩邊云誰什麼道誰恁麼道峰便喝居士云在這裏峰云莫是當陽道麼居士云背後底峰回首云看看居士云草賊大敗草賊大敗峰無語

一日高峰與居士並行居士廼前行一步云我強如師一步峰云無背向老翁要爭先在居士云苦中苦未是此一句峰云怕翁不甘居士云老翁若不堪高峰堪作箇什麼峯云若有棒在手打不解倦居士便行一擡云不多好峯始拈棒被居士把住云這賊今日一場敗闕峯笑云是我拙是公巧居士乃撫掌出云平交平交

一日又問峯云此去峯頂有幾里峰云是什麼處去來居士云可畏峻硬不得問著峯云是多少居士云一二三峰云四五六居士云何不道七峰云纔道七便有八居士云得也得也峯云一任添取居士乃咄之而去師隨後咄之

居士云不得堂堂道峯云還我恁麼時龐公主人翁來居士云少神作麼峰云好箇問訊問不著人居士云好來好來

丹霞和尚一日來訪居士纔到門首見靈照攜一菜籃子便問居士在否靈照放下籃子歛手而立霞又問居

士在否靈照攜籃子便行歸舉似居士居士云赤土搽
牛糲丹霞乃隨後入見居士居士見來不起亦不言霞
乃豎起拂子居士豎起槌子霞云只恁麼更別有居士
云這回見師不似於前霞云不妨減人聲價居士云比
來折你一下霞云恁麼則癡却天然口也居士云你癡
由本分累我亦癡霞便擲下拂子而去居士召云然闍
梨然闍梨霞不顧居士云不惟患癡更兼患聾

丹霞一日訪居士云昨日相見何似今日居士云如法
舉昨日事與汝著箇宗眼霞云只如宗眼還著得龐翁
歷居士云我在汝眼裏霞云某甲眼窄向何處著翁居

士云是眼何窄是身何安霞不顧居士云更道一轉便
得此語全霞亦不對居士云就中這一句無人道得
一日居士向丹霞前叉手立少時却出去霞不顧居士
却來坐霞却向居士前叉手立少時便入方丈居士云
汝入我出未有事在霞云這老翁出出入入有甚了期
居士云却無些子慈悲心霞云引得這漢到這田地居
士云把什麼引霞乃拈起居士幞頭云却似一箇老師
僧居士却將幞頭安霞頭上云一似箇少年俗人霞應
喏三聲居士云猶有昔時氣息在霞廼拋下幞頭云大
似一箇烏紗巾居士廼應喏三聲霞云昔時氣息爭忘

得居士彈指三下云動天動地

一日丹霞見居士來便作走勢居士云猶是拋身勢恁
生是嚙呻勢霞便坐居士乃向前以拄杖劃地作七字
霞於下面書箇一字居士云因七見一見一忘七霞云
這裏著語居士乃哭三聲而去

一日居士與丹霞出行見江水澄碧居士指水云得恁
麼也還辨不出霞云的箇辨不出居士以手斛水潑霞
三徧霞云莫恁麼莫恁麼却以水潑居士居士云當恁
麼時堪作箇什麼霞云無物外居士云得便宜人少得
便宜人少霞無對居士云誰不落便宜

百靈和尚居士一日路上相逢靈問云昔日居士南嶽
得力句還曾舉向人來未居士云曾舉來靈云舉向什
麼人居士指胸云龐翁靈云直是妙德空生也歎居士
不及居士却問阿師得力句有誰知靈戴笠子便行居
士云善爲道路靈不顧

一日百靈問云道得道不得俱未免汝且道未免箇什
麼居士以目瞬之靈云奇特更無此也居士云師錯許
人靈云誰不恁麼誰不恁麼居士珍重而去

一日百靈在方丈內坐居士入來靈把住云今人道古
人道居士作麼生道居士打靈一摑靈云不得不道居

士云道卽有過靈云還我一搨來居士近前云試下手
看靈便珍重一日居士問百靈云是這箇眼目免得人
口麼靈云作麼免得居士云情知情知靈云棒不打無
事人居士轉身云打打靈方拈棒起被居士把住云與
我免看靈無語

普濟和尚一日問居士云是箇言語今古少人避得唇
舌只如翁避得麼居士應諾濟再舉前話居士云什麼
處去來濟又舉前話居士云什麼處去來濟云非但如
今古人亦有此語居士作舞而去濟云這風顛漢自
過教誰點檢

居士見大同普濟禪師居士拈起手中箴籥云大同師大同師濟不應居士云石頭一宗到師處冰消瓦解濟云不得龐翁舉灼然如此居士拋下箴籥云寧知不值一文錢濟云雖不值一文錢欠他又爭得居士作舞而去濟提起箴籥云居士居士回首濟作舞而去居士撫掌云歸去來歸去來

一日普濟去看居士居士云憶得在母胎時有一則語舉向阿師不得作道理主持濟云猶是隔生也居士云向師道不得怕濟云驚人之句爭得不怕居士云如師見解可謂驚人濟云不作道理却成道理居士云不但